

*Idea positiva substantiæ immaterialis æ-  
quæ intelligibilis est ac materialis.*

Quin pudet has nugas atque ægræ somnia mentis  
Spargere, & incauto sciolum dare verba popello:  
Quid facili tritæque viâ, vefane, relictâ  
Scepticus ancipiti sequeris *Pyrrhona* meatu?  
Quid Phœbi in radios rutilumque impingis in ortum,  
Et quereris densam vel claro in lumine noctem?  
Quænam animæ natura fiet, si scire laboras,  
Quærendo quod quæris habes, eadẽque coerces  
Quæ peperit modò causa sitim; se vindice nodus  
Solvitur, ac dubium dubitandi præripit ansam.  
Scilicet arcana sola est perceptio mentis  
*Idea*, & variis variato nomine rebus,  
Quod dubitat, sperat, metuit, sequiturque, fugitque,  
Quod petit ex iustâ rationum pondera lance;  
Grandia quod firmâ connectit sensa catenâ,  
Colligit & sparsi latitantia fragmina veri;  
Quod præcos restaurat avos, præsentia cernit  
Sæcula, & ad feros penetrat post fata nepotes;  
Quod manet immotum, terrâsque invisit & astra,  
Et simul humanis velox allabatur oris,  
Et ruit in cœlum, Superumque palatia scandit:  
Cumque aliquò pergat, non per longinqua viarum  
Tendit iter, lassòque premit vestigia gressu;  
Sed velut auritas quercus, sylvasque sequaces  
*Thyrsi* flexere modi, præruptæque mitis  
Traxit saxa fides, quò designasset aratro  
Mcenia grandisonus *Thebana* conditor urbis:  
Hoc firmum fixumque domi sic cuncta sequuntur,  
Et videt extremas propriis in sedibus oras:  
Quod præsens ubicunque velit *Garamantas* & *Indos*  
Advocat, aut *Scythicos* frigente sub axe colonos:  
Quod rapit è cœlo (verbis audacia detur)  
Numina, & excelsum descendere cogit Olympum,  
Et fruitur propiore Deo: quod desuper olim  
Venit, & in terras patriâ concessit ab aulâ,  
Multaque jam retinet divini insignia partus,  
Terrenâsque odit fœces & corporis umbras,  
Dicimus hoc *animam* cuncti, mentemque vocamus.  
Quid mihi jam *Samia* narras consulta senectæ,  
*Stoicidam*que crepas & magno pondere barbam &  
Triste supercilium, quasque olim *Academia* nugas  
Tradidit, & culto fallax *Epicurus* in horto  
Promis, & antiqui juras in verba Magistri?  
Horum infausta animos nox & caligo tegebat,  
Externo ex vultu satagunt penetralia rerum  
Scire, nec in proprios animam valuere recessus  
Cogere, & ex ipsa mentem perdiscere mente.  
Hinc animæ partes lux, ignis, flamma subibat,  
Multaque continuo præservida sphaerula gyro  
Tunc sapuisse dedit; cumque omnia segmina vires  
Juncta tulere suas, quæ nil modò singula possent  
Multa juvant, faciuntque acrem delira Senatum:  
Insulsæque Atomæ mundi moderantur habenas,  
Et graciles paci præfunt bellòque Cylindri,  
*Bæotum* in patria spissòque sub aëre nati.  
Quoque magis sublime aliquid vel numine dignum  
Creditur, & pingues meritum virtutibus aras,  
Quò magis ingenio pollet sapiensque putatur,

Tantò plus pernix & fervidiore citaturi  
Curriculo, partes ruit ac turbatur in omnes.  
Illinc prima suos habuerunt sidera cultus,  
Et superos auxere choros, & prima sacerdos  
Thura dabat stellis, primosque adolebat honores,  
Et cœli similes flammis dedit hostia flammæ,  
Sacrificisque illos imitata est ignibus ignes.  
Illibata focos nata est hæc Vesta perennes;  
Et colis æthereum tu *Persidos* Incola *Mithram*,  
Quem tua, Phœbe, latent, aut cui tua sacra tacentur,  
*Cynthia*, decidos reficis quæ solibus orbes.  
Hinc ut quam celeri rapiantur sydera motu  
Monstraret, sacrumque Deorum ostenderet æstum,  
*Fynge* tulit *Strophalum*que, Magus, *Rhombum*que, rotabat.  
En! lepidos, *Epicure*, Deos, quosque ipse putabas  
Securo intrepidam luxu traducere vitam:  
En! quæ tu statuis placidâ compòsta quiete,  
Nullis pressa malis nullisque agitata procellis  
Numina, tranquillos labi festiva per annos:  
Aspice quàm crebris quatiantur inania ventis;  
Quantillum foelicis habent, quàm nulla tuetur  
Majestas veneranda Deum, tantòque misellus  
Plus patitur duri, quantò tibi major habetur.  
Et si à materia nequeas disjungere mentem,  
Respice quid superis dignum est, & crede quod illis  
Convenit, & nimium taciturnus Numen adora.

*Magnitudo objectorum in quacunque distantia  
justius exhibetur per perspicilla quàm  
per nudos oculos.*

Respice de cœlis (modò si tubus Opticus adsit)  
Instaurare tibi quantos, *Galilæe*, triumphos  
Ætas docta studet, tandem Natura fatetur  
Se victam, Nomenque tuum veneratur & Artem;  
Sensibus infidis diffidere iussa ministris.  
In mediis cœci tenebris erravimus olim,  
Sæpèque nos fallax rerum delusit imago.  
In pratis si quando procul cum conjugue vacca  
Discubuit, flores carpens summòsque hyacinthos;  
Credidimus stulti comitantem *Phyllida* *Mopsus*,  
Multaque tum lacrymis frustra tum voce precantem.  
Siquando in celsis errabant montibus agni,  
Diximus esse nivem, & demirabamur amictu  
Tam nitido terram vestitam temnere cœlos,  
Certaque non longè jaculantem spicula Phœbum.  
Te verò auxilium vitris, *Galilæe*, ferente,  
Justius apparent quæcunque objecta tuemur:  
His fruar & nunquam me fallat fœmina picta,  
Decipiente novos mentita senectæ colores.  
Dignoscam vetulæ quot sulci fronte patefunt,  
An sit pinguis humus, facies, an gramina nutrit,  
Barbæque multiplici gladio promissa minatur:  
An oculo caret, an proprio, fictòve superbit  
Naso, quàm pulchra & quàm sit me digna marito.  
Quicquid habet rutilo Phœbus spectabile vultu  
Evomat exposco, (sternutet cætera turba)  
Excipiam lætus, quotquot gerit orbe sagittas;  
Nulla fenestros offendunt sidera ocellos,  
Ablatis circum radiis & luce nocenti,  
Imbelli posthac jactabit fulmina dextrâ  
*Divum hominumque Pater*: certò dignoscimus in quos  
Mittit, & exitium docti vitabimus ultro.